



Inatsisartunut ilaasortaq Knud Fleischer, Kattusseqatigiit Partiiat.

§ 37 apeqquteqaat nr. 2011-090-mut akissut pisissiusaat pisissillu atorlugit Nunatsinni piniarneq pillugu.

Inatsisartut suleriaasianni § 37, imm. 1 naapertorlugu Nunatsinni pisissiusaat pisissillu atorlugit piniarneq pillugu apeqqummik saqqummiisimavutit. Apeqqut uanga susassa qarfigisannit akineqarnissaminut innersuunneqarpoq.

Ima aperivutit:

Maani nunami piniarnermut pisissiusaat pisissillu atorneqarsinnaappat?

Akissut:

Sakkunik atuinnermut malittarisassat nalinginnaasumik uumasoaqatigiinnut ataasiakkaanut nalunaarutini erseqqissarsimasarput. Taakku minnerpaaffissatigut piumasaqaatinik aalajangersaasarput, aallaasinut imassat aalajangersimasut taamaallaat atorneqarsinnaasut sulloqqortussutsigullu minnerpaaffissamik piumasaqaateqartarluni. Tamanna uumasoaqatigiinnik pisassiisutaasartunut tamanut kiisalu ukalernut, puisinut teriannianullu atuuppoq. Immikkut eqqaasariaqartut tassaapput puisit, tassani qassusersorluni piniarneq aamma atorneqarsinnaammat, kommunip malittarisassaliomeratigut. Timmissanik piniarnermut atatillugu ileqqutoq malillugu timmissanut qarsoq miloriullugu atorneqarsinnaavoq.

Maannakkulli arfennut mikinernut killilersugaanngitsunut, Niisanut, Aarlunnut, Niisarnanut, Anarnanut aamma Aarluarsunnut nalunaaruteqanngilaq. Piniarneq aallaaniarnerlu pillugit Inatsisartut inatsisaanni nr. 15-imi, 6. november 1997-imeersumi taamaallaat aallaasit eqiinnartakkat eqittaannartakkallu atorneqarnissaat inerteqqutaammata, inatsisitigut akornutissaqartoqanngilaq, uumasoaqatigiit siuliani eqqaaneqartut pisissimik imaluunniit pisissiusaamik piniarneqarpata. Aamma Kalaallit Nunaannut Aallaasinut inatsit naapertorlugu pisissimik imaluunniit pisissiusaamik peqarnissamut akornutissaqartoqanngilaq.

Taamaattorli arfennut mikinernut killilersugaanngitsunut nalunaarutissaq maannakkut suliarineqarpoq. Taanna aallaasit imassaannut sulloqqortussutsinullu piumasaqaati-taqassaaq, aamma tamatuma kingorna pisseq aamma pisissiusaaq atorlugu uumasoaqatigiinnik taakkuninnga piniarnissamut periarfissaqassanngilaq.

Aammattaaq Naalakkersuisoqarfiup umimmaat illersugaanerat piniagaanerallu pillugit nalunaarut iluarsartuullugu suliarivaa ilaatigut pisissit qarsullu akuerineqarsimasut atorsinnaanissaannut periarfissiisumik. Pisseq qarsorlu atorlugit misileraalluni piniarneq 2010-mi ingerlanneqarsimavoq. Nalunaarummut missingersuut upernaap ingerlanerani tusarniaassutigineqassaaq, aamma siunertarineqarpoq, pisseq qarsorlu atorlugit umimmannik piniarneq kingusinnerpaamik 2013-imi eqqunneqassasoq.

Naggataatigut oqaatigineqassaaq, danskit sakkut aamma qaartuujasut pillugit inatsisaat nr. 704, 22. juni 2009-meersoq naapertorlugu Danmarkimi inatsisinik atoritsisup akuersissutaanik peqartinnani pisissiusaamik peqarnissaq inerteqqutaammat.

Inussiarnersumik inuulluaqqusillunga

Ane Hansen

14. apr 2011
Suliap no. 2011-048727
Dok. Nr. 604200

Postboks 269
3900 Nuuk
Tlf. (+299) 34 50 00
Fax (+299) 32 47 04
E-mail: apnn@nanoq.gl
www.nanoq.gl